

წიგნი, რომელიც ამდიდრებს და ამზენებს ქართულ ეკონომიკურ ლიტერატურას



წიგნი „ეკონომიკა და მენეჯმენტი ენერგეტიკაში“, რომლის რეცენზიასაც ვთავაზობთ მკითხველს, 2022 წელს გამოიცა ქუთაისში. იგი ეხება თანამედროვეობის ერთ-ერთ აქტუალურ თემას. მისი ავტორია ამ დარგის ცნობილი სპეციალისტი ეკონომიკის მეცნიერებათა დოქტორი, პროფესორი დემურ ჩომახიძე. სარეცენზიო წიგნი უთუოდ გამორჩეულია მის მრავალრიცხოვან სამეცნიერო შრომებში, რომელთა მნიშვნელოვანმა ნაწილმა ჩვენი მეცნიერ-ეკონომისტთა დადებითი რეცენზია დაიმსახურა.

ჩვენი რეცენზიის ეს სათაური ავიღეთ საქართველოს მეცნიერებათა აკადემიის წევრ-კორესპონდენტის, ეკონომიკურ მეცნიერებათა აკადემიის პირველი პრეზიდენტის აწ გარდაცვლილი ლეო ჩიქავას გამოსვლიდან, რომელიც მან 2004 წლის 24 ნოემბერს გააჟღერა საქართველოს ილია ჭავჭავაძის სახელობის მწიგნობართა ასოციაციისა და ეკონომიკურ მეცნიერებათა აკადემიის ერთობლივ სხდომაზე. აქ პროფესორ დემურ ჩომახიძის წიგნი „საქართველოს ენერგეტიკული უსაფრთხოება“ განიხილებო-

და (რეცენზია 2004 წელს ჟურნალში „ენერჯია“ N4(32) დაიბეჭდა). ბატონმა ლეომ მაშინ წიგნს შესაბამის შენიშვნებთან ერთად საბოლოოდ აღნიშნული შეფასება მიცა.

პროფესორი დ. ჩომახიძე მას შემდეგაც ნაყოფიერ მოღვაწეობას ეწეოდა და განვლილ პერიოდში, გარდაცვალებამდე (2023 წელი) არაერთი გამორჩეული ნაშრომი გამოსცა. მათ შორის უნდა აღინიშნოს მისი „ეკონომიკა და მენეჯმენტი ენერგეტიკაში“, რომელიც აკაკი წერეთლის სახელმწიფო უნივერსიტეტის გამომცემლობამ დასტამბა.

წიგნი მოიცავს 400-ზე მეტ გვერდს, სადაც ჩამოყალიბებულია ენერგეტიკის განვითარების ეკონომიკისა და მენეჯმენტის აქტუალური საკითხები.

კომპლექსური ნაშრომი 13 თავისაგან შედგება და მასში განხილულია დარგის სტრუქტურის, ენერგეტიკის დამოუკიდებელი რეგულირების, ენერგოდაზოგვის მენეჯმენტის, ბუნებრივი ენერგეტიკული რესურსების, ენერგეტიკის განვითარებაში საზოგადოების შეგნებული მონაწილეობის აუცილებლობის, საქართველოს ენერგეტიკული სექტორის აგებულების და მართვის, ტარიფების დონის, ენერგეტიკული უსაფრთხოების მენეჯმენტის, ენერგეტიკული ბალანსის, ენერგეტიკაში გარემოდაცვითი მენეჯმენტის საკითხები, აგრეთვე საქართველოს ენერგეტიკის განვითარების კონცეპტუალური და მეთოდოლოგიური საფუძვლები და ენერგეტიკის მენეჯმენტის სრულყოფის თანამედროვე მიმართულებები.

ნაშრომის აქტუალობა ეჭვგარეშეა. დამოუკიდებლობის მოპოვების შემდეგ ენერგეტიკის ეკონომიკისა და მენეჯმენტის პრობლემათა მოგვარება სახელმწიფო პოლიტიკის ერთ-ერთ უმთავრეს საკითხად იქცა. ნაშრომი საინტერესოდ იკითხება და ეყრდნობა უახლეს, სარწმუნო წყაროებსა და მონაცემებს. მასში იკვეთება ავტორის ღრმა ანალიზის უნარი და დარგის

უადრესად მაღალ დონეზე ცოდნა.

მიგვაჩნია, რომ პროფ. დ. ჩომახიძის წარმოდგენილი ნაშრომი ქართულენოვანი სამეცნიერო ლიტერატურის კარგი შენაძენია. იგი დიდ სარგებლობას მოუტანს ენერგეტიკის ეკონომიკისა და მენეჯმენტის პრობლემებით დაინტერესებულ ყველა პირსა და უწყებას.

ევგენი ბარათაშვილი

ეკონომიკის მეცნიერებათა დოქტორი, საქართველოს ტექნიკური უნივერსიტეტის პროფესორი

ნიკოლოზ ჩიხლაძე

ეკონომიკის მეცნიერებათა დოქტორი, თეოლოგიის დოქტორი, აკაკი წერეთლის სახელმწიფო უნივერსიტეტის პროფესორი, ქუთაისის უნივერსიტეტის პროფესორი